



***Siaran Akhbar ini Diembargo hingga  
6.00petang, Sabtu, 9 September 2017***

*(Sila semak selepas ucapan)*

## **UCAPAN BAHASA MELAYU**

**UCAPAN CIK RAHAYU MAHZAM, PENERUSI JAWATANKUASA BULAN BAHASA, AHLI MAJLIS BAHASA MELAYU SINGAPURA DAN ANGGOTA PARLIMEN GRC JURONG, DI MAJLIS PELANCARAN BULAN BAHASA 2017, SABTU, 9 SEPTEMBER, DI TAMAN WARISAN MELAYU**

Tetamu terhormat, Encik Masagos Zulkifli Bin Masagos Mohamad, Menteri Sekitaran dan Sumber Air

Profesor Madya Dr Muhammad Faishal Ibrahim, Pengerusi Majlis Bahasa Melayu Singapura

Puan Chang Hwee Nee, Ketua Pegawai Eksekutif, Lembaga Warisan Negara

Rakan sekerja Parlimen

Puan Zuraidah Abdullah, Pengerusi Yayasan Warisan Melayu

Para tetamu yang dihormati

Tuan-tuan dan Puan-puan sekalian



## **PENGENALAN**

1. Selamat datang ke Majlis Pelancaran Bulan Bahasa 2017, dan terima kasih kerana meluangkan masa anda bersama kami di Taman Warisan Melayu.  
Begitu cepat masa berlalu, terasa seperti baru sahaja kita berkumpul di Muzium Negara Singapura untuk menyambut Bulan Bahasa tahun lalu.
2. Tahun lepas merupakan tahun pertama saya dilantik sebagai pengerusi Jawatankuasa Bulan Bahasa setelah diberi tanggungjawab oleh Majlis Bahasa Melayu Singapura. Ianya merupakan tugas dan tanggungjawab yang penting memandangkan sambutan tahunan Bulan Bahasa sudah menjadi acara yang dinanti-nantikan oleh masyarakat Melayu tahun demi tahun.

Banyak yang telah berubah dalam masa setahun.

## **MEMBESARKAN ANAK DAN MELESTARIKAN BAHASA USAHA KOLEKTIF**

3. Pada bulan April lalu, saya menjadi seorang ibu dan anak sulung saya, Ayden, cepat sekali membesar. Seperti ramai warga Singapura, saya dan suami saya bekerja dan sentiasa sibuk dengan urusan di luar rumah.
4. Kami amat bertuah kerana adanya keluarga yang sering membantu kami menjaga dan mendidik Ayden, terutama sekali ibu saya. Beliau lah yang menyokong dan membantu kami untuk mengasuh Ayden. Sememangnya,



kita perlukan usahasama sekampung untuk membesarkan seorang anak. Dalam bahasa Inggeris, *it takes a village to raise a child*.

5. Dalam saya melaksanakan tanggungjawab sebagai pengerusi Jawatankuasa Bulan Bahasa untuk tahun kedua, pengalaman menjadi seorang ibu telah memberi saya satu arah tujuan dan perspektif yang baru. Harapan saya untuk Ayden adalah agar dia membesar dengan sihat, gembira dan mempunyai budi pekerti yang baik. Untuk kesejahteraan emosi dan pembentukan peribadinya, saya rasa, tiada khasiat untuk jiwa yang lebih baik daripada bahasa dan budaya Melayu kita sendiri.
6. Ibu saya tahu akan pentingnya bahasa dan budaya apabila beliau membesarkan kami dan kini, saya sendiri memahaminya sebagai seorang ibu.
7. Kita berkumpul hari ini untuk meraikan usaha bersama masyarakat kita untuk memelihara dan melestarikan warisan, budaya dan bahasa Melayu untuk anak-anak kita. Usaha ini harus diteruskan dan tanggungjawab kita terhadap generasi seterusnya perlu kita pikul bersama.

#### **SUMBANGAN GURU PERINTIS DAN PENERIMA AGAB**

8. Hadirin sekalian, semangat untuk menyumbang kepada masyarakat sememangnya ada dalam masyarakat kita. Semangat ini terserlah dalam



kalangan pendidik kita. Setiap tahun, selain mengetengahkan rakan-rakan kerjasama dan program-program semasa Bulan Bahasa, kami juga menghasilkan buku-buku nota dan panduan bahasa untuk dikongsi dan diberikan kepada orang ramai.

9. Tahun ini, kami amat gembira dengan sokongan guru-guru perintis seperti Cikgu Adam Fadila dan Cikgu Ummul Kalthum; pemenang Anugerah Guru Arif Budiman Cikgu Abdul Malek Ahmad dan Cikgu Siti Zainab Zainal; dan ahli Majlis Bahasa Melayu Singapura kami sendiri, Cikgu Tajudin Jaffar. Mereka telah menyumbangkan kandungan bahasa Melayu dalam buku-buku nota untuk rujukan pelajar Bahasa Melayu dan masyarakat.

#### **DUTA BAHASA, RAKAN BAHASA DAN PERANAN MEREKA**

10. Rasa tanggungjawab dan semangat untuk menyumbang juga dikongsi oleh tiga orang Duta Bahasa baru yang akan dilantik hari ini. Saya pasti, mereka bertiga amat memahami peranan pendidik dan pendidikan. Sebagai wakil Duta-duta Bahasa yang lain, saya mengucapkan selamat datang kepada Puan Jumaini Ariff, Ustaz Muhammad Zahid Bin Mohd Zin dan Encik Dzar Ismail. Tahniah di atas pelantikan anda hari ini!
11. Usaha gigih kami dalam pembangunan anak-anak muda dapat dilihat dalam jumlah Rakan Bahasa yang semakin meningkat. Tahun ini, 161 orang Rakan



Bahasa dilantik daripada 81 buah sekolah dan ini merupakan jumlah tertinggi sejauh ini.

12. Perjalanan pelajar-pelajar ini sebagai Rakan Bahasa tidak mereka lalui sendiri. Guru-guru merekalah yang telah menjadi pendorong utama. Kami berterima kasih kepada semua guru-guru yang meluangkan masa dan tenaga untuk memberikan peluang kepada pelajar-pelajar ini meningkatkan diri.
13. Saya telah mendapat peluang untuk berjumpa dan mengenali ramai Rakan Bahasa sepanjang dua tahun ini dan saya amat gembira mendengar cerita-cerita tentang peningkatan dan pencapaian para pelajar ini setelah dilantik sebagai Rakan Bahasa. Saya harap inisiatif Rakan Bahasa ini akan terus berkembang.
14. Tahun ini, semua Rakan Bahasa telah melalui sesi latihan bahasa dan budaya serta latihan kemahiran penyampaian yang dikendalikan oleh Duta Bahasa, pelatih daripada Newsmaker, BERITA Mediacorp dan dosen Muzium daripada Taman Warisan Melayu. Para pelajar telah meluangkan masa dan tenaga untuk menyediakan dan menyampaikan Jelajah Muzium di galeri tetap pada hari ini. Terima kasih kepada semua ibu bapa, guru-guru dan para pelajar atas sokongan dan kerja keras anda.

## **PROGRAM BULAN BAHASA 2017 DAN TERIMA KASIH ATAS SOKONGAN**



15. Kalendar acara Bulan Bahasa 2017 terus kekal padat dan memaparkan lebih daripada seratus program oleh rakan kerjasama, supaya semua golongan masyarakat akan dapat terus menikmati Bahasa Melayu sebagai bahasa yang indah dan dinamik.
16. Kami amat bersyukur atas sokongan yang diberikan oleh semua Rakan Kerjasama kami termasuk – Lembaga Perpustakaan Negara, MESRA dan Jawatankuasa Eksekutif Kegiatan Melayu (MAECs), TEATRO, Majlis Pembangunan Buku Negara Singapura (NBDCS), Perbayu NTU, HazWorkz Design dan banyak lagi. Terlalu ramai untuk dinamakan semua.
17. Terima kasih atas sokongan anda dalam menganjurkan program-program bahasa Melayu yang menarik untuk masyarakat.
18. Sukacita saya juga menyebut tentang beberapa program yang mengetengahkan usaha pengembangan Bahasa Melayu dan pencapaian pemenang Pingat Kebudayaan, seperti Cikgu Yusnor Ef, Cikgu Suratman Markasan dan Cikgu Mohamed Latiff Mohamad. Kejayaan mereka dapat memberi inspirasi kepada anak-anak muda kita.
19. Saya juga berterima kasih kepada semua Penasihat rakan kerjasama kami daripada estet-estet perumahan Tampines, Nee Soon, Keat Hong di GRC Chua Chu Kang, Woodlands di GRC Sembawang dan GRC Jurong atas



sokongan mereka semua dalam meraikan Bulan Bahasa. Marilah kita raikan bahasa dalam masyarakat kejiwaan kita, supaya semua orang, tidak kira bangsa, dapat menghargai keindahan budaya kita.

### **SOKONGAN DANA**

20. Acara Bulan Bahasa juga tidak terlaksana tanpa sokongan dana. Kita sangat beruntung kerana menerima sokongan yang kuat daripada Lee Foundation, Shaw Foundation, Dana Pemadanan Kebudayaan (Cultural Matching Fund), Majlis Ugama Islam Singapura (MUIS), Lembaga Tote Singapura, Kwan Im Thong Hood Cho Temple, Comfort Delgro dan Second Chance.
21. Pelancaran Bulan Bahasa hari ini juga dimeriahkan dengan sokongan Agrobazaar, F&N Drinks dan King's Potong Ice-Cream.
22. Saya juga berterima kasih kepada MDIS, Sunshine bakeries, dan Mamanda yang telah menyokong beberapa acara Bulan Bahasa tahun ini. Bagi pihak Jawatankuasa Bulan Bahasa dan Majlis Bahasa Melayu Singapura, ribuan terima kasih atas sokongan anda dan kami harap sokongan yang diberikan akan berterusan.
23. Sekalung budi juga saya ucapkan kepada Jawatankuasa Pembelajaran dan Penggalakan Penggunaan Bahasa Melayu (MLLPC) dan Dana Kedwibahasaan Lee Kuan Yew (LKYFB). Kerjasama mereka telah



mbolehkan wujudnya program yang menyeluruh untuk masyarakat. Kami berharap akan dapat meneruskan usaha untuk meningkatkan penggunaan dan perkembangan bahasa Melayu di Singapura.

### **SEKALUNG BUDI KEPADA JAWATANKUASA BULAN BAHASA**

24. Sambutan Bulan Bahasa tidak akan sempurna tanpa komitmen oleh Jawatankuasa Bulan Bahasa yang telah meluangkan masa dan tenaga untuk menjayakan acara ini. Saya ingin mengucapkan terima kasih kepada semua ahli Jawatankuasa Bulan Bahasa khususnya kepada Puan Julina Khusaini, dan Cikgu Farizan Amin, di atas sokongan mereka yang tidak pernah putus.
25. Di kesempatan ini, saya memohon agar semua ahli Jawatankuasa Bulan Bahasa, dapat berdiri agar majlis ini dapat memberi penghargaan atas peranan anda menjayakan Bulan Bahasa.
26. Kami juga disokong oleh Lembaga Warisan Negara (NHB), sekretariat kepada Majlis Bahasa Melayu Singapura dan Bulan Bahasa. Untuk semua perancangan dan kerja keras anda dalam menjayakan Bulan Bahasa, sekali lagi, terima kasih.

### **TAMAN WARISAN MELAYU SEBAGAI LOKASI PELANCARAN**

27. Akhir sekali, saya juga ingin mengambil kesempatan ini untuk mengucapkan setinggi-tinggi terima kasih kepada pihak Taman Warisan Melayu dan





Yayasan Warisan Melayu yang sudi berkongsi ruang bersama kami, dan juga bersama semua para hadirin dan peserta Bulan Bahasa tahun ini.

28. Ini merupakan hab yang kaya dengan sejarah, sebagai tempat perdagangan, perniagaan dan kedermawanan di Singapura. Ia juga pernah menjadi pusat penerbitan, terutama sekali dalam pendidikan dan sastera Melayu. Justeru, tempat ini sesuai sekali untuk pelancaran Bulan Bahasa tahun ini.
29. Bulan Bahasa akan memperdalamkan lagi tema Ilmu, Budaya dan Mesra, dalam usaha kita untuk melestarikan penggunaan bahasa Melayu. Kembalinya acara tahun ini di kawasan Kampong Gelam menandakan pentingnya hubungan nilai-nilai kemasyarakatan dan warisan Melayu.

## **PENUTUP**

30. Bahasa Melayu kekal sebagai Bahasa Kebangsaan Singapura. Semoga budaya Melayu sentiasa berkembang dalam anyaman kehidupan masyarakat kita dan generasi muda kita terus menggunakan bahasa Melayu agar bahasa kita kekal relevan.

Bahasa Kita. Gunakanlah.

Terima kasih.